

**BOSNA I HERCEGOVINA**  
Ministarstvo odbrane-obrane



**БОСНА И ХЕРЦЕГОВИНА**  
Министарство одбране

**P R A V I L N I K**  
**O SVEČANOSTIMA I POČASTIMA**

Sarajevo, juli 2010. godine

Na osnovu člana 13. stav (1), tačke t) i člana 15. stav (1), tačke a) Zakona o odbrani Bosne i Hercegovine („Službeni glasnik Bosne i Hercegovine“, broj 88/05), Ministar odbrane donosi

## P R A V I L N I K O SVEČANOSTIMA I POČASTIMA

### POGLAVLJE I. OPĆE ODREDBE

#### Član 1. (Predmet Pravilnika)

Ovim Pravilnikom uređuje se način organiziranja svečanosti i odavanja počasti u Ministarstvu odbrane Bosne i Hercegovine (u daljem tekstu: Ministarstvo odbrane) i Oružanim snagama Bosne i Hercegovine (u daljem tekstu: Oružane snage) kao i način učešća pripadnika Ministarstva odbrane i Oružanih snaga na svečanostima i počastima koje organiziraju druge organizacije i institucije Bosne i Hercegovine.

#### Član 2. (Definicije)

U svrhu tumačenja i primjene ovog Pravilnika, definicije u ovom Pravilniku imaju sljedeća značenja:

- a) **Svečanost** je manifestacija koja se organizira povodom obilježavanja značajnih datuma, događaja i aktivnosti.
- b) **Počast** je aktivnost Oružanih snaga propisana procedurama Oružanih snaga koja se ukazuje domaćim i inozemnim zvaničnicima prilikom posjete Bosni i Hercegovini, Ministarstvu odbrane i Oružanim snagama i prilikom sahrane-pogreba visokih državnih zvaničnika i pripadnika Ministarstva odbrane i Oružanih snaga kao i pripadnika prijašnjih entitetskih vojski.
- c) **Počasna straža** je aktivnost Oružanih snaga koja se provodi na zahtjev institucija Bosne i Hercegovine tokom posjete zvaničnika institucijama Bosne i Hercegovine i prilikom sahrane-pogreba.
- d) **Visoki domaći državni zvaničnik** je lice na funkciji člana Predsjedništva Bosne i Hercegovine, Predsjedavajućeg Vijeća ministara i Ministra odbrane.
- e) **Visoki strani državni zvaničnik i delegacija** su lica na funkciji predstavnika druge države u svojstvu suverena, predsjednika države, predsjednika vlade, ministra odbrane i načelnika generalštaba.
- f) **Bivši visoki domaći državni i entitetski zvaničnici** su lica koja su vršila funkciju člana Predsjedništva Bosne i Hercegovine, predsjedavajućeg Vijeća ministara, ministra odbrane Bosne i Hercegovine, predsjednika entiteta, predsjednika Vlade Republike

Srpske, premijera Vlade Federacije Bosne i Hercegovine i ministra bivših entitetskih ministarstava odbrane.

- g) *Najviša vojna odlikovanja/priznanja* su najviše rangirana odlikovanja i priznanja koja su takvim označena u relevantnim propisima Bosne i Hercegovine ili entiteta.
- h) *Udruženje* je udruženje boraca, veterana, invalida, civilnih žrtava rata, porodica šehida i poginulih boraca ili slično udruženje koje je historijski i sadržajno povezano sa Oružanim snagama.

## **POGLAVLJE. II VRSTE SVEČANOSTI PROTOKOL SVEČANOSTI**

### **Član 3. (Vrste svečanosti)**

- (1) Svečanosti u Ministarstvu odbrane se organiziraju povodom:
  - a) Praznika Bosne i Hercegovine,
  - b) 1. decembra, Dana Oružanih snaga,
  - c) Vjerskih praznika,
  - d) Drugim povodima, a po odluci ministra odbrane.
- (2) Svečanosti u Oružanim snagama se organiziraju povodom:
  - a) Praznika Bosne i Hercegovine,
  - b) 1. decembra, Dana Oružanih snaga,
  - c) Vjerskih praznika,
  - d) Dana rodova, službi, pukova, brigada, komandi i jedinica Oružanih snaga,
  - e) Ispraćaja i dočeka jedinica Oružanih snaga u operacijama podrške miru izvan Bosne i Hercegovine;
  - f) Polaganja zakletve oficira, podoficira i vojnika koji prvi put pristupaju Oružanim snagama,
  - g) Predaje zastava pukovima, brigadama, jedinicama i institucijama Oružanih snaga,
  - h) Početka i završetka obuke i školovanja,
  - i) Primopredaje komandnih dužnosti,
  - j) Drugim prilikama po odluci ministra odbrane ili naređenju načelnika Zajedničkog štaba Oružanih snaga.

### **Član 4. (Sadržaj protokola svečanosti)**

- (1) Protokol svečanosti izrađuje komandant jedinice, a odobrava prepostavljeni starješina.

- (2) Protokol svečanosti načelno obuhvata:
- a) Postrojavanje jedinica,
  - b) Doček gostiju,
  - c) Primopredaju stroja,
  - d) Doček zastave,
  - e) Intoniranje himne,
  - f) Obraćanje komandanta/starještine svečanosti,
  - g) Obraćanje prepostavljenog,
  - h) Obraćanje gosta,
  - i) Ispraćaj zastave,
  - j) Ispraćaj gostiju.

Član 5.  
**(Isticanje zastava i obilježja)**

- (1) Na svakoj svečanosti obavezno je isticanje zastave Bosne i Hercegovine, u skladu sa Pravilnikom o upotrebi zastava i obilježja u Oružanim snagama.
- (2) Ostale zastave i obilježja ističu se u skladu sa Pravilnikom o upotrebi zastava i obilježja u Oružanim snagama.

Član 6.  
**(Odijevanje)**

Državni službenici i zaposlenici Ministarstva odbrane, kao i pripadnici Oružanih snaga, na svečanostima su odjeveni u skladu sa relevantnim propisima.

Član 7.  
**(Nošenje oružja)**

- (1) Na svečanostima oružje se nosi u skladu sa Pravilnikom o nošenju i upotrebi oružja u Oružanim snagama.
- (2) Komandant svečanosti odgovoran je za pravično i sigurno rukovanje naoružanjem.

Član 8.  
**(Zastavni vod)**

Za vojne svečanosti pukova, brigada, jedinica Oružanih snaga, zavisno od karaktera, sadržaja i obima svečanosti, komande iz svojih sastava mogu formirati zastavni vod.

Član 9.  
**(Vojni orkestar)**

Upotreba vojnog orkestra na vojnim i drugim svečanostima i počastima, vrši se u skladu sa odlukom koju donosi ministar odbrane ili naređenjem načelnika Zajedničkog štaba Oružanih snaga.

Član 10.  
**(Politička neutralnost)**

- (1) Svečanosti u Ministarstvu odbrane i Oružanim snagama ne mogu se koristiti u političke svrhe niti za aktivnosti političkih stranaka.
- (2) Pripadnici Ministarstva obrane i Oružanih snaga koji su govornici na svečanostima, obavezni su pridržavati se odredbi zakona Bosne i Hercegovine i podržavati provođenje Općeg okvirnog sporazuma za mir u Bosni i Hercegovini.

**POGLAVLJE III. NAČIN OBILJEŽAVANJA SVEČANOSTI**

Član 11.  
**(Svečanosti povodom praznika Bosne i Hercegovine)**

- (1) Povodom praznika Bosne i Hercegovine u Ministarstvu odbrane i Oružanim snagama održavaju se svečanosti.
- (2) Način, vrijeme i mjesto održavanja svečanosti povodom praznika Bosne i Hercegovine određuje ministar odbrane.
- (3) Ministar odbrane odlukom definira aktivnosti iz stava (2), u skladu sa Pravilnikom o provođenju protokolarnih aktivnosti u Ministarstvu odbrane i Oružanim snagama (u daljem tekstu: Pravilnik o protokolarnim aktivnostima).

Član 12.  
**(Svečanost povodom 1. decembra - Dana Oružanih snaga)**

- (1) Dan Oružanih snaga je praznik koji se obilježava prigodnim svečanostima i kulturno-zabavnim i sportskim programima u Ministarstvu odbrane i na lokacijama razmještaja komandi i jedinica Oružanih snaga, u vojno-diplomatskim i vojnim predstavništvima Bosne i Hercegovine u inozemstvu i misijama u kojima učestvuju pripadnici Oružanih snaga.
- (2) Ministar odbrane donosi odluku o formiranju Odbora za obilježavanje Dana Oružanih snaga koji planira i prati realiziranje aktivnosti vezanih za obilježavanje Dana Oružanih snaga.
- (3) Centralna vojna svečanost i Svečana akademija se organiziraju i realiziraju u skladu sa relevantnim propisima.
- (4) Povodom Dana Oružanih snaga dodjeljuju se odlikovanja, priznanja, nagrade i pohvale.
- (5) Svečanostima u povodu obilježavanja Dana Oružanih snaga prisustvuju građani i predstavnici kulturnog, javnog i političkog života.

Član 13.  
**(Svečanosti povodom vjerskih praznika)**

- (1) Svečanosti povodom vjerskih praznika održavaju se u Ministarstvu odbrane i Oružanim snagama, u skladu sa Pravilnikom o organizaciji i načinu funkcioniranja

vjerske službe u Ministarstvu odbrane i Oružanim snagama i Pravilnikom o protokolarnim aktivnostima.

- (2) Ministar odbrane će svojom odlukom i načelnik Zajedničkog štaba Oružanih snaga će svojim naređenjem definirati aktivnosti iz stava (1) ovog Pravilnika.
- (3) Svečanost obilježavanja vjerskog praznika jedne konfesije ne smije vrijedati vjerska osjećanja drugih konfesija.

#### Član 14.

##### **(Svečanosti povodom dana pukova, brigada, komandi i jedinica Oružanih snaga)**

- (1) Pukovi, brigade, komande i jedinice Oružanih snaga obilježavaju svoje praznike organiziranjem vojne svečanosti.
- (2) Plan i program svečanosti odobrava nadređeni starješina, a pukovima ministar odbrane.
- (3) Na ovim svečanostima dodjeljuju se priznanja, nagrade i pohvale.
- (4) Ministar odbrane, na prijedlog načelnika Zajedničkog štaba Oružanih snaga, svojom odlukom utvrđuje dan brigada, komandi i jedinica Oružanih snaga.

#### Član 15.

##### **(Svečanosti povodom ispraćaja i dočeka jedinica Oružanih snaga u / iz operacija podrške miru izvan Bosne i Hercegovine)**

- (1) U povodu odlaska jedinica Oružanih snaga na izvršavanje misija izvan Bosne i Hercegovine, kao i dočeka istih po vraćanju iz misije, organizira se svečani ispraćaj - doček.
- (2) Pri ispraćaju i dočeku u/iz operacija podrške miru organizira se svečani ispracaj i doček.
- (3) Svečanostima pored zvaničnika mogu prisustvovati članovi porodice, rodbina i prijatelji.
- (4) Na ovim svečanostima angažira se Počasna jedinica i Vojni orkestar Oružanih snaga, u skladu sa Privremenim smjernicama ministra odbrane o upotrebi Počasne jedinice Oružanih snaga.
- (5) Ministar odbrane donosi odluku o vremenu, mjestu i načinu održavanja svečanosti.

#### Član 16.

##### **(Svečanost povodom potpisivanja ugovora i polaganja zakletve)**

- (1) Kada se u profesionalnu vojnu službu Oružanih snaga primaju oficiri, podoficiri i vojnici, svečanost potpisivanja ugovora i polaganja zakletve organizira se na jednom mjestu.
- (2) Navedena lica potpisuju Ugovor o prijemu u profesionalnu vojnu službu pred zastavom Bosne i Hercegovine.
- (3) Vrijeme i mjesto potpisivanja ugovora i polaganja zakletve određuje Ministar odbrane.

- (4) Na svečanostima potpisivanja ugovora i zakletve, pored vojnih zvaničnika i predstavnika Ministarstva odbrane i Oružanih snaga i predstavnika medija, mogu prisustvovati i predstavnici civilnih vlasti, članovi porodice, građani, vojno-diplomatski predstavnici akreditirani u Bosni i Hercegovini i dr.
- (5) Za oficire, podoficire i vojnike koji su bili odsutni iz opravdanih razloga na dan potpisivanja ugovora i polaganja zakletve, potpisivanje se organizira u matičnoj jedinici.

Član 17.

**(Svečanosti povodom predaje zastava pukovima, brigadama, komandama i jedinicama Oružanih snaga )**

- (1) Zastave imaju pukovi, a svoje zastave mogu imati brigade, komande i jedinice Oružanih snaga.
- (2) Zastave pukovima, brigadama, komandama i jedinicama Oružanih snaga predaje ministar odbrane ili osoba koju on ovlasti na svečanosti koja se organizira povodom prijema zastave.
- (3) Ministar odbrane odlukom regulira vrijeme, mjesto i način predaje zastave.

Član 18.

**(Svečanosti prilikom početka i završetka obuke i školovanja)**

- (1) Početak i završetak obuke jedinica (oficira, podoficira i vojnika) obilježava se prigodnom svečanošću.
- (2) Na ovim svečanostima nakon prigodnog govora mogu se uručiti diplome, nagrade i pohvale.
- (3) Nadležni starješina naredbom regulira mjesto, vrijeme i način održavanja svečanosti.

Član 19.

**(Svečanosti prilikom primopredaje komandnih dužnosti)**

- (1) Primopredaja komandnih dužnosti vrši se na svečan način, osim ako okolnosti ne uslovjavaju drugačije.
- (2) Svečanoj primopredaji dužnosti pred jedinicom prisustvuje nadređeni starješina, starješina koji predaje i starješina koji prima dužnost.
- (3) Primopredaji dužnosti načelnika Zajedničkog štaba Oružanih snaga i njegovih zamjenika, komandanta Operativne komande Oružanih snaga i njegovih zamjenika, komandanta Komande za podršku Oružanih snaga i njegovih zamjenika, komandanata brigade i njima ravnih komandi kao i komandanata pukova prisustvuju ministar odbrane i/ili njegovi zamjenici, rukovodeći državni službenici i neposredno podređene starještine lica koja vrše primopredaju dužnosti.

Član 20.

**(Ostale vojne svečanosti)**

- (1) Komandanti brigada, pukova, komandi i jedinica Oružanih snaga mogu upriličiti svečanosti i drugim povodom (prilikom unapređenja, postizanja izuzetnih rezultata

pojedinaca, jedinice i dr.).

- (2) Odobrenje za održavanje ovih svečanosti daje nadređeni starješina.

### Član 21.

#### (Svečanosti povodom obilježavanja događaja ili aktivnosti iz perioda rata)

- (1) Prilikom održavanja svečanosti povodom obilježavanja događaja ili aktivnosti iz perioda rata, a čiji su organizatori institucije u BiH, ministar odbrane može odobriti angažiranje resursa Oružanih snaga Bosne i Hercegovine ako:
- a) Događaj ili aktivnost iz stava (1) ovog člana nije spomenut u potvrđenoj optužnici, procesu u toku ili u izrečenoj pravomoćnoj presudi od strane Međunarodnog krivičnog suda za bivšu Jugoslaviju za krivična djela i to:
    - 1) Teške povrede Ženevske konvencije iz 1949. godine,
    - 2) Kršenja zakona ili običaja ratovanja,
    - 3) Genocid i
    - 4) Zločini protiv čovječnosti.
  - b) Događaj ili aktivnost iz stava (1) ovog člana nije spomenut u potvrđenoj optužnici, procesu u toku ili u izrečenoj pravomoćnoj presudi od strane Suda Bosne i Hercegovine i drugih sudova u Bosni i Hercegovini u čijoj su nadležnosti krivična djela protiv čovječnosti i vrijednosti zaštićenih međunarodnim pravom i to:
    - 1) Genocid,
    - 2) Zločini protiv čovječnosti,
    - 3) Ratni zločin protiv civilnog stanovništva,
    - 4) Ratni zločin protiv ranjenika i bolesnika,
    - 5) Ratni zločin protiv ratnih zarobljenika,
    - 6) Organiziranje grupe ljudi i podstrekivanje na učinjenje krivičnih djela genocida, zločina protiv čovječnosti i ratnih zločina,
    - 7) Protupravno ubijanje i ranjavanje neprijatelja,
    - 8) Protupravno oduzimanje stvari od ubijenih i ranjenih na ratištu i
    - 9) Povrede zakona ili običaja rata.
  - c) postoji pravovremeno podnesen zahtjev organizatora (najmanje 30 dana prije datuma obilježavanja) za angažiranjem resursa Oružanih snaga u obilježavanju događaja ili aktivnosti,
  - d) obilježavanje događaja ili aktivnosti iz perioda rata predstavlja afirmaciju Oružanih snaga.
- (2) U roku od 60 dana od dana usvajanja ovog Pravilnika, Ministar odbrane propisuje obrazac za podnošenje zahtjeva za angažiranje resursa Oružanih snaga u obilježavanju događaja ili aktivnosti iz perioda rata.

**Član 22.**  
**(Ostale svečanosti)**

Pripadnici Ministarstva odbrane i Oružanih snaga mogu po pozivu učestvovati u svečanostima koje organiziraju:

- a) Institucije Bosne i Hercegovine,
- b) entitetske institucije
- c) institucije Brčko distrikta,
- d) udruženja građana i nevladine organizacije.

**POGLAVLJE IV. POČASTI**

**Član 23.**  
**(Odavanje počasti)**

- (1) Počasti se odaju:
  - a) Visokim domaćim i stranim državnim zvaničnicima i delegacijama,
  - b) visokim vojnim zvaničnicima Oružanih snaga,
  - c) prilikom sahrane- pogreba, i
  - d) prilikom obilježavanja značajnih datuma i događaja.
- (2) Počast visokim stranim državnim zvaničnicima i delegacijama koje vrše zvaničan posjet Bosni i Hercegovini, Ministarstvu odbrane i Oružanim snagama odaje Počasna jedinica Oružanih snaga u skladu sa propisom za upotrebu Počasne jedinice koji donosi ministar odbrane.
- (3) Počast visokim domaćim državnim zvaničnicima i delegacijama koje vrše posjet Ministarstvu odbrane, te posjet komandama i jedinicama Oružanih snaga, odaje Počasna jedinica Oružanih snaga u skladu sa propisom za upotrebu Počasne jedinice koji donosi ministar odbrane.
- (4) Prilikom posjete brigadama, pukovima, komandama i jedinicama Oružanih snaga od strane ministra ili zamjenika ministra, načelnika i zamjenika načelnika Zajedničkog štaba Oružanih snaga, odaje se počast postrojavanjem jedinice za odavanje počasti do jačine voda.
- (5) Počast Počasnom stražom se odaje prilikom svečanosti u povodu prijema zvaničnika i sahrane-pogreba.

**Član 24.**  
**(Počasti prilikom obilježavanja značajnih datuma i događaja)**

- (1) Oružane snage se mogu angažirati za odavanje počasti prilikom obilježavanja značajnih datuma i događaja za Bosnu i Hercegovinu, te prilikom obilježavanja godišnjica smrti istaknutih ličnosti u Bosni i Hercegovini i u odbrambenom sistemu Bosne i Hercegovine.

- (2) Prilikom obilježavanja značajnih datuma i događaja za Bosnu i Hercegovinu, te prilikom obilježavanja godišnjica smrti istaknutih ličnosti u Bosni i Hercegovini, počast se odaje Počasnom jedinicom Oružanih snaga po posebnoj odluci Predsjedništva Bosne i Hercegovine.
- (3) Prilikom obilježavanja godišnjica smrti istaknutih ličnosti u odbrambenom sistemu Bosne i Hercegovine, počast se odaje jedinicom Oružanih snaga po odluci ministra odbrane.

Član 25.  
**(Počasti prilikom sahrane-pogreba)**

- (1) Počast postrojavanjem Počasne jedinice Oružanih snaga i ispaljivanjem počasnih plotuna odaje se prilikom sahrane-pogreba visokog domaćeg državnog zvaničnika, po posebnoj odluci Predsjedništva Bosne i Hercegovine.
- (2) Počast prilikom komemoracije visokom domaćem državnom zvaničniku odaje se počasnom stražom, po posebnoj odluci iz stava (1) ovog člana.
- (3) Počast jedinicom Oružanih snaga odaje se prilikom sahrane-pogreba pripadnika Oružanih snaga.
- (4) Počast jedinicom Oružanih snaga prilikom sahrane-pogreba pripadnika Oružanih snaga odaje se uz saglasnost porodice, a o čemu odlučuje načelnik Zajedničkog štaba Oružanih snaga.
- (5) Na zahtjev porodice može se dati počast jedinicom Oružanih snaga prilikom sahrane-pogreba penzioniranih pripadnika Oružanih snaga.
- (6) Zahtjev iz stava 4. za penzionirane generale Oružanih snaga odobrava ministar odbrane, a načelnik Zajedničkog štaba Oružanih snaga za ostale penzionirane pripadnike Oružanih snaga.
- (7) Za preminule pripadnike Ministarstva odbrane i Oružanih snaga može se organizirati komemoracija.

Član 26.  
**(Odavanje počasti prilikom sahrane-pogreba pripadnika bivših entitetskih vojski)**

- (1) Upotrebu pripadnika Oružanih snaga Bosne i Hercegovine u odavanju počasti prilikom sahrane-pogreba pripadnika bivših entitetskih vojski može odobriti ministar odbrane ako su ispunjeni sljedeći uslovi:
  - a) Ako je lice kojem se treba dati počast bio/la pripadnik neke od bivših entitetskih vojski, i da je:
    - 1) bilo/la na dužnosti komandanta samostalnog bataljona, puka, brigade ili višoj komandnoj dužnosti, ili
    - 2) imalo lični čin pukovnika (ili potpukovnika VRS) ili viši čin, ili
    - 3) nosilac najvišeg vojnog odlikovanja/priznanja.

b) Ako protiv lica:

- 1) ne postoji potvrđena optužnica podignuta od strane tužilaštava pred Međunarodnim krivičnim sudom za bivšu Jugoslaviju ili tužilaštava na bilo kojem nivou u Bosni i Hercegovini,
  - 2) nije proces u toku,
  - 3) nije izrečena presuda na kaznu zatvora od strane Međunarodnog krivičnog suda za bivšu Jugoslaviju ili sudova na bilo kojem nivou u Bosni i Hercegovini.
- c) Počast ne pripada licu protiv kojeg postoji potvrđena optužnica, a nije se odazvalo pozivu na suđenje pred Međunarodnim krivičnim sudom za bivšu Jugoslaviju ili suda na bilo kojem nivou u Bosni i Hercegovini.
  - d) Ukoliko lice nije smijenjeno sa neke dužnosti Odlukom Visokog predstavnika za Bosnu i Hercegovinu ili na osnovu aneksa 1A Općeg okvirnog sporazuma za mir u Bosni i Hercegovini, a odluke nisu poništene.
  - e) Ukoliko je zahtjev neposredno podnijela porodica ili dala svoju suglasnost udruženju ili odboru za sahranu.
  - f) Sastav jedinice za odavanje počasti biti će prilagođen tradiciji i vjerskim običajima.
- (2) U roku 60 dana od dana usvajanja ovog Pravilnika Ministar odbrane propisuje obrazac za podnošenje zahtjeva za upotrebu pripadnika Oružanih snaga Bosne i Hercegovine u odavanju počasti prilikom sahrane-pogreba pripadnika bivših entitetskih vojski.

### Član 27.

#### **(Odavanje počasti prilikom sahrane-pogreba bivših visokih državnih i entitetskih zvaničnika)**

Ministar odbrane može odobriti odavanje počasti prilikom sahrane-pogreba bivših visokih državnih i entitetskih zvaničnika pod uvjetima iz člana 26. stav (1) tačka b) c) i d) ovog Pravilnika.

### Član 28.

#### **(Počasti prilikom obilježavanja godišnjica značajnih događaja i datuma)**

- (1) Odavanje počasti jedinicom Oružanih snaga može se odobriti prilikom obilježavanja godišnjica značajnih događaja i datuma koje organiziraju:
  - a) Institucije Bosne i Hercegovine,
  - b) entitetske institucije,
  - c) institucije Brčko distrikta i
  - d) udruženja građana i nevladine organizacije.
- (2) U roku od 60 dana od dana stupanja na snagu ovog Pravilnika, ministar odbrane

propisat će obrazac za podnošenje zahtjeva za angažiranje pripadnika/jedinica Oružanih snaga Bosne i Hercegovine za odavanje počasti, kao i upotrebu ostalih resursa Oružanih snaga Bosne i Hercegovine prilikom obilježavanja značajnih događaja i datuma.

## POGLAVLJE V. ZAVRŠNE ODREDBE

### Član 29. (Finansiranje )

Finansijska sredstva za realiziranje aktivnosti iz ovog pravilnika osiguravaju se u budžetu odbrane.

### Član 30. (Standardne operativne procedure)

Načelnik Zajedničkog štaba Oružanih snaga propisuje Standardne operativne procedure vojnih svečanosti i počasti u roku od 90 dana od dana stupanja na snagu ovog Pravilnika.

### Član 31. (Stupanje na snagu)

- (1) Stupanjem na snagu ovog pravilnika stavlja se van snage Pravilnik o svečanostima i počastima u Oružanim snagama Bosne i Hercegovine, broj: 13-02-3-1615/10 od 01.04.2010. godine.
- (2) Ovaj pravilnik stupa na snagu danom potpisivanja.

Broj: 06-02-3-3578 /10  
Sarajevo, 04.08. 2010.godine

